

## МЕСЯЦА ИУНИА В 8-Й ДЕНЬ.

### СВЯТАГО ВЕЛИКОМУЧЕНИКА ФЕОДОРА СТРАТИЛАТА

#### Стихиры на 6, глас 2.

Подобен: Егда от Древа:

**В**есь привел еси себе тебе Давшему, преблаженне, жизнь совершенну, \* яко всеплодие живо и одушевлено \* и жертву благоприятну и пречисту. \* Темже молитвенник был еси благоприятен, \* бури изымая вся, верою поющия тя, мучениче, \* и призывающия тя, Феодоре.

**С**емя возделав прилежно всеянное Слова \* в чистой твоей души, \* сие умножил еси болезнями страдания \* и, мудре положен в Небесных житницах, \* нетленно обрел еси наслаждение, \* егоже ныне насыщаяся, блаженне, \* твоими ко Христу ходатайствы \* верно поющия тя спасай.

**М**учениче страстотерпче Христов, \* иже в различных нуждах спасай мольбами твоими, \* всяко убо обстояние отревая \* и отгоня душегубительную печаль, \* благодать же и милость нам прося, \* яко да молитвами твоими спасшиися, \* радующися, воспоем вси \* честныя подвиги твоя, Феодоре.

#### Ины стихиры, глас 4.

Подобен: Яко добля:

**С**традалец доблественный, \* воин непобедим \* Духом Святым показался еси, \* низлож борителя \* мудростию словес твоих \* и дел твоих, мудре, терпеливными явленьми. \* Темже приял еси венцы победныя \* и с Вышними лики сочетался еси, \* великомучениче Феодоре.

**Б**ожественный столп был еси \* благочестия, пребогате, \* злочестивых капищ возгнушався, \* и овча всесовершенно, \* и заклание благоприятно, \* Заклавшемуся тебе ради чисте приводим, \* Прославльшему святую твою память \* и чудес сокровище ты сущим в мире \* Даровавшему, Феодоре.

**Н**а крест воздвижен, \* и плоти стружеме, \* и острыми стрелами уязвляемь, \* и на древе протяжаемь, \* и мечи усекаемь, \* и всякими хитростями болезней окружаемь, \* непреклонен и непобедим явился еси \* силою на Кресте Пригвожденнаго, \* слава мучеников, Феодоре.

#### Слава, глас 5:

**Д**несь возсия паче денницы, \* честная память страстотерпца Христова, \* верных сердца невидимо просвещающи \* и облаки душ отгоняющи действием благодати Духа. \* К немуже, мучениколюбцы, воззовем: \* радуйся, иже верным явлься Богодарованная благодать \* и чудес множества простирая \* к тебе притекающим, Феодоре блаженне. \* Христа непрестанно моля, не оскудей, \* вечных благ получитьи \* верою творящим память твою.

**И ныне, праздника, или Богородичен, или Крестобогородичен.**

Подобен: Радуйся:

**А**гнца Своего Агница иногда зрящи, \* к заклению тщащяся, \* усердно последоваше, сия воиющи Ему: \* камо идеши, Чадо Мое Сладчайшее, Христе? \* Чесо ради скорое течение сие, Долготерпеливе, \* течещи неленостно? \* Иисусе возжеленнейший, \* Безгрешне, Многомилостиве Господи, \* даждь Ми слово, рабе

Твоей, Сыне Мой Вселюбезнейший. \* Не презри, Щедре, молча, Тя странно  
рождшую, \* Боже Всецедре, \* даруй ми миру велию милость.

На стиховне Октоиха.

Слава, глас 8. Самогласен:

**Б**ожиих даров яко тезоименита \* и того наследника блаженства, \* вси восхвалим,  
вернии, \* и ублажим по достоянию Феодора, добляго великомученика, \* вселенныя  
поборника: \* молит бо ся Христу Богу о душах наших.

И ныне, Богородичен или Крестобогородичен:

Подобен: О, преславнаго чудесе:

**Н**е терплю, Чадо, \* видящи Тя на древе уснувши, \* бодрость всем подающаго, \*  
яко да иже древле преступления плодом \* сном погибельным уснувшим \*  
Божественную и спасительную бодрость подаси, \* Дева глаголаше, плачущися, \*  
Юже величаем.

Тропарь, глас 4:

**В**оинствословием истинным, страстотерпче, \* Небеснаго Царя воевода  
предобрый был еси, Феодоре: \* оружиеми бо веры ополчился еси мудренно,  
\* и победил еси демонов полки, \* и победоносный явился еси страдалец. \* Темже тя  
верою \* присно ублажаем.

## НА УТРЕНИ

Оба канона Октоиха, без мученичнов, и святого на 6. Канон святого, егоже краегранесие: Пою тя, даров Божественных тезоименита, хвалами Божественными. Творение Феофаново, глас 4.

### Песнь 1

**Ирмос:** Моря чермную пучину \* невлажными стопами \* древний пешешествовав Израиль, \* крестообразныма Моисеовыма рукама \* Амаликову силу в пустыни победил естъ.

**М**ученик, яве светлостьюми украшаемъ, Добротворцу предстоиши Христу, от Него удобряемъ, яко даров тезоименит Божественных, мучениче Феодоре.

**Б**ожественными вооружився, Феодоре, оружию веры, вражия ссека еси твердо душетленные полки и, победитель быв, с мученики венчался еси.

**С**ветлое твоея души храбрство показуя злочестивому, Богомудре, царю, премудростию словес твоих и благодатию дел, сего посрамил еси, Феодоре.

**Богородичен:** Без семени Отчею волею от Божественнаго Духа Божия зачала еси Сына и плотию родила еси, Иже из Отца без матере, нас же ради из Тебе без отца.

### Песнь 3

**Ирмос:** Веселится о Тебе Церковь Твоя, Христе, зовущи: \* Ты моя крепость, Господи, \* и прибежище, и утверждение.

**О**полчение злочестивое, яко воевода силен, победил еси и строптиваго змия вся хитрости попра еси.

**Я**ко усерден душею, умышлением благочестивым, славне, злочестивых погубил еси прелюбодейственная чтилища.

**К**репостию помысла лютых наносения претерпел еси, животворней мертвости Подвигоположника подобяся.

**Богородичен:** Ты едина, сущим на земли, паче естества, благих Ходатаица, Мати Божия была еси. Темже Ти, радуйся, вопием.

### Седален, глас 8.

**Подобен:** Премудрости:

**Б**ожественное всеоружие восприим и идольскую леть низложив, \* Ангелы возставил еси восхвалити подвиги твоя, \* ибо, Божественною любовию ум распалив, \* на огненную смерть доблественно дерзнул еси. \* Темже тезоименитно просящим тя \* даеши Божественная дарования, страсотерпче Феодоре. \* Сего ради вопием ти: \* моли Христа Бога грехов оставление подати \* чтущим любовию память твою.

### Слава, и ныне, праздника или Богородичен:

**В** напасти многоплетенная впад от враг видимых и невидимых, \* бурею одержим безчисленных согрешений моих, \* и яко к теплomu заступлению и покрову моему, Чистая, \* ко пристанищу притекаю Твоя благости. \* Темже, Пречистая, из Тебе воплощенному безсеменно \* молися прилежно о всех рабех Своих, \* непрестанно молящих Ти ся, Богородице Пречистая, \* молящи Его присно согрешений оставление даровати \* воспевающим достойно славу Твою.

### Крестобогородичен:

Дева и Мати Исусова, на Древе зрящи Творца, \* стенияше, слезящи, и люте уязвляшеса, душу и тело растерзаючи, \* биющися, и к Нему вопиющи горько, и взываючи: \* увы Мне, о Сыне Мой! \* Како претерплю страсть Твою, гвоздие и копие, \* Яже без болезни Тя рождши? \* Но потщися востати, и видети Тя, Сыне Мой и Боже, \* и от рыдания престати и болезни, \* и поющии Твоя страсти согрешений разрешение примут.

### Песнь 4

**Ирмос:** Вознесена Тя видевши Церковь на Кресте, \* Солнце Праведное, \* ста в чине своем, \* достойно взываючи: \* слава силе Твоей, Господи.

Уязвил еси змия, уязвити тя хотящаго, и терпеливыми сопротивлении мученик явился еси, поя прилежно тя Укрепльшему: слава силе Твоей, Господи.

Изнурил плоть многими ранами, помысл непреклонен поставил еси, треблаженне, поя усердно тя Укрепльшему: слава силе Твоей, Господи.

Украсился еси страданьми Владыки, твоя честная страдания, премудре, совокупль, и сподобился еси Того светлости и желаемя красоты.

**Богородичен:** Неискусобратно родила еси, о Дево, и по рождестве явилася еси девствующи паки. Темже немолчными гласы, еже радуйся, Тебе, Владычице, верою несумненною взываем.

### Песнь 5

**Ирмос:** Ты, Господи, мой Свет, \* в мир пришел еси, \* Свет Святый, обращающа из мрачна неведения \* верою воспевающа Тя.

Кроплением плотских кровей оставил еси демонскую на пагубу приносимую кровь, непобедиме Феодоре.

О, нрава благочестива! О, доблественна разума! О, веры теплейшия честнаго стратотерпца, еуже Бога получи!

Ум имея, светом Божиим осияемь, поборника злобы омрачил еси, змия, Богоносе Феодоре.

**Богородичен:** Тя оружие непобедимое на враги предлагаем, Тя утверждение и надежду нашего спасения, Богоневесто, стяжахом.

### Песнь 6

**Ирмос:** Пожру Ти со гласом хваления, Господи, \* Церковь вопиет Ти, \* от бесовския крове очищися \* ради милости от ребр Твоих \* истекшею Кровию.

Победил еси усердием дерзостным низлагающих, на кресте простерт и гвоздьми прободаемь, блаженне, изображая спасительную страсть Зиждителя.

Законно страдающему, Христос тебе является, в темнице затворену, воздвизая яко Подвигоположник к подвигом на враги борения, преславне.

Жертву чисту, и святу, и непорочну тебе ради волею Себе жертву принесшему, привел еси себе, стратотерпче Феодоре.

**Богородичен:** О, чудо, всех чудес новейшее! яко Дева, во утробе вся Содержащаго неискусомужно заченши, не тесновмести.

## Кондак, глас 2.

Подобен: Вышних ища:

**Мужеством души в веру оболкийся \* и глагол Божий, аки копие, в руку взем, врага победил еси, \* мучеников превелий Феодоре, \* с ними Христу Богу моляся не престай о всех нас.**

**Икос: Страдальцев пресветлую доброту, приидите вси, песненными венцы, вернии, Феодора венчаем: дар бо Божий велик миру явися сияньми чудес Врага бо побеждь велиара страдании честными, одождает вместо кровных капель исцелений токи, с сими убо всеми радуется Христу и дает мир неоскуден. Тем вопием ему: моли непрестанно о всех нас.**

## Песнь 7

**Ирмос: В пещи авраамстии отроцы персидстей, \* любовьию благочестия паче, \* нежели пламенем, опаляеми, взываху: \* благословен еси в храме славы Твоя, Господи.**

**В пещи твоих подвигов, мучениче славне, вещь злочестия попалил еси и светило благочестия, поя, был еси: благословен еси в храме славы Твоя, Господи.**

**Яко воевода, яко смыслен и трезвеник делом, царя несмыслена и злочестива премогл еси и показал еси сего некрепка, укрепився силою духовною.**

**Закон побеждается похвалами величества твоего: ты бо пресветлыми просиял еси облистании мучения, Владыце твоему вопия, Феодоре: благословена держава Твоего владычества.**

**Богородичен: Вышняго освященное Божественное селение, радуйся, Тобою бо дадесе радость, Богородице, зовущим: благословена Ты в женах еси, Всенепорочная Владычице.**

## Песнь 8

**Ирмос: Руце распростер, Даниил \* львов зияния в рове затче, \* огненную же силу угасиша, \* добродетелию препоясавшися, \* благочестия рачители, отроцы, взывающе: \* благословите, вся дела Господня, Господа.**

**На Тя уповав, мене ради Крест и смерть претерпевшаго, на крест воздвигохся, Владыко, и уязвляемь стреляньми, и лютым прикасяся ранам, Господи, вопиял еси, мучениче, стражда, доблемудренне Феодоре.**

**Привел еси жертву чисту себе Зиждителю твоему, радуяся, Феодоре, и отлучився, славне, к Царству Небесному, с мученики священно взывая всегда: благословите, вся дела Господня, Господа.**

**Яко крин, яко шипок разумный, вонями страданий твоих благоухаеши нас, отгоня благодатию всегда злосмрадие страстей наших и понуждая вопити благовонною душею: благословите, вся дела Господня, Господа.**

**Богородичен: Ты едина во всех родех, Дево Пречистая, Мати явилася еси Божия, Ты Божества была еси жилище, Всенепорочная, не опальшиися огнем неприступнаго Света. Темже вси Тя благословим, Марие Богоневесто.**

## Песнь 9

**Ирмос:** Камень нерукосечный \* от несекомья горы, Тебе, Дево, \* краеугольный отсечся, \* Христос, совокупивый разстоящаяся естества, \* тем, веселящся, Тя, Богородице, величаем.

**Н**ыне со блаженными соборы и мученическими лики, яко украшен страданьми, соводворяся и свесеся, венец нося, предстоиши желаемому тебе, Феодоре.

**К** высоте Небесней взятся, о земных небрег, и желаемаго тебе конца сподобился еси, то самое совершение желаний, Феодоре, восприем, радуяся.

**И**мый к Богу дерзновение, яко добль и мудр страдалец, восхваляющим тя любовию согрешений оставление проси, от страстей и скорбей всех нас избавляя.

**Е**динаго Тя, безсмертна Слова, плотию пострадавша и умерша, мученик Богомудрый возжелав, безсмертия Твоего получив, на Небеса вселися, к Зиждителю всех Всесильну.

**Богородичен:** Благословенную Марию и Божию Матерь Деву, приидите вси, верою и любовию непрестанно восхвалим, Еяже ради обретше вечное радование.

**Светилен.**

**Подобен:** Небо звездами:

**Т**ы, красен добротою, и воевода Богомощен, \* и славный во страдальцех воин, принесся еси Христу \* и миру дар Божественный, Феодоре, показался еси.

**Слава, и ныне, праздника или Богородичен:**

**Д**ержавным Твоим кровом от враг навета нас, Чистая, \* Твоя рабы, сохраняй вся невреда: \* Тя бо стяжахом едину прибежище в нуждах.

**На стиховне Октоиха. Слава, глас 8:**

**С**традальческий составль подвиг, \* на прелесть мужествовал еси, Феодоре, \* огнеещанным языком твоим \* посрамил, еси Ликиниеву безчеловечество. \* Темже, и со Ангелы радуяся, блаженне, \* моли Христа Бога, \* яко да милостив будет нам в День Судный.

**И ныне, праздника или Богородичен.**

**Крестобогородичен писан вечер на стиховне.**

## НА ЛИТУРГИИ

Блаженны праздника или Октоиха и святого песнь 3-я.

**О**полчение злочестивое, яко воевода силен, победил еси и строптивого змия вся хитрости попрал еси.

**Я**ко усерден душею, умышлением благочестивым, славне, злочестивых погубил еси прелюбодейственная чтилища.

**Слава:** Крепостию помысла лютых наношения претерпел еси, животворней мертвости Подвигоположника подобяся.

**И ныне: Богородичен:** Ты едина, сущим на земли, паче естества, благих Ходатаица, Мати Божия была еси. Темже Ти, радуйся, вопием.

### Тропарь святого, глас 4:

**В**оинствословием истинным, страсотерпче, \* Небеснаго Царя воевода предобрый был еси, Феодоре: \* оружиеми бо веры ополчился еси мудренно, \* и победил еси демонов полки, \* и победоносный явился еси страдалец. \* Темже тя верую \* присно ублажаем.

### Кондак святого, глас 2.

**М**ужеством души в веру оболкийся \* и глагол Божий, аки копие, в руку взем, врага победил еси, \* мучеников превелий Феодоре, \* с ними Христу Богу моляся не престай о всех нас.

**Прокимен, глас 7: Возвеселится праведник о Господе:**

**Стих: Услыши, Боже, глас мой, внегда молити ми ся к Тебе.**

### Апостол к Тимофею, зачало 292.

**Ч**адо Тимофее, возмогай во благодати, яже о Христе Иисусе, и яже слышал еси от мене многими свидетели, сия предаждь верным человеком, иже довольни будут и иных научити. Ты убо злопостражди яко добр воин Иисус Христов. Никтоже бо воин бывая обязуется куплями житейскими, да воеводе угоден будет. Аще же и пострададет кто, не венчается, аще не законно мучен будет. Трудяющемся делателю прежде подобает от плода вкусити. Разумей, яже глаголю: да даст убо тебе Господь разум о всем. Поминай Господа Иисуса Христа воставшаго от мертвых, от семени Давидова, по благовествованию моему, в немже злостражду даже до уз, яко злодей, но слово Божие не вяжется. Сего ради вся терплю избранных ради, да и тии спасение улучат еже о Христе Иисусе, со славою вечною.

**Аллилуия, глас 4: Праведник, яко финикс, процветет, яко кедр, иже в Ливане, умножится.**

### Евангелие от Матфея, зачало 36.

**Р**ече Господь Своим учеником: се, Аз посылаю вас яко овцы посреде волков, будите убо мудри яко змия, и цели яко голубие. Внемлите же от человек, предадут бо вы на сонмы, и на соборищах их биют вас. И пред владыки же и цари ведени будете Мене ради, во свидетельство им и языком. Егда же предадут вы, не пецытесе, како или что возглаголете. Не вы бо будете глаголющии, но Дух Отца вашего глаголай в

вас. Предаст же брат брата на смерть и отец чадо, и востанут чада на родители и убьют их. И будете ненавидими всеми имени Моего ради, претерпевый же до конца, той спасен будет

**Причастен:** В память вечную будет праведник:

### Святой великомученик Феодор Стратилат

Святой великомученик Феодор Стратилат пострадал за Христа в 319 году, при Римском императоре Ликийнине (управлял восточной половиной Римской империи с 307 по 324 год). Перед мученической кончиной, которая последовала 8 февраля, он завещал своему слуге Уару, чтобы тело его было погребено в родном городе Евхайты (в северной части Малой Азии), в имении родителей. Перенесение мощей святого великомученика Феодора Стратилата совершилось 8 июня 319 года. В честь этого события 8 июня установлено празднование. Память святому великомученику Феодору Стратилату совершается также 8 февраля, в день его кончины (см.: Миняя–февраль).